

DERAF TEKS UCAPAN
YANG DIPERTUA
MAJLIS PERBANDARAN SEBERANG PERAI
MAJLIS PELANCARAN PROJEK PERINTIS DASAR PENGASINGAN
SISA DI PUNCA KATEGORI HOTEL/OUTLET MAKANAN
03 MAC 2016 (KHAMIS), 3:00 PETANG
HOTEL IXORA, PERAI

.....
Terima kasih Pengacara Majlis

Yang Dihormati Ahli Majlis-Ahli Majlis
Majlis Perbandaran Seberang Perai

Yang Berusaha Tuan Sr. Hj Rozali bin Hj Mohamud
Setiausaha Perbandaran, MPSP

Yang Berusaha Encik Moses Poon,
Pengurus Operasi, Hotel Ixora

Ketua-ketua Jabatan

Rakan-rakan media

Tuan-tuan dan Puan-puan yang dihormati sekalian.

.....
Assalamualaikum warahmatullahi wabarakatuh, selamat petang dan salam
sejahtera,

Terlebih dahulu, saya ingin mengucapkan terima kasih kepada kepada
Bahagian Kerajaan Tempatan, Pejabat Setiausaha Kerajaan Negeri Pulau

Pinang dan juga staff MPSP kerana telah berusaha dengan keras dan berjaya menganjurkan Majlis Pelancaran Projek Perintis Dasar Pengasingan Sisa di Punca Kategori Hotel/Outlet Makanan di Hotel Ixora pada petang ini.

Para hadirin sekalian,

Menguruskan sisa adalah sangat mencabar, memerlukan publisiti yang mantap dan kerjasama antara semua penduduk dan rakyat. Seperti yang tuan-tuan dan puan-puan sedia maklum, Pulau Pinang merupakan sebuah negeri yang pesat membangun terutamanya melalui sektor hartanah. Jumlah sisa yang dijana bertambah dari tahun ke tahun. Setiap hari, sekitar 1,700 tan sisa dari negeri Pulau Pinang dilupuskan di Pulau Burung. Lama kelamaan, tapak pelupusan ini akan penuh dan tapak baru harus dikenal pasti dan disediakan untuk menampung sisa negeri. Mencari tapak baru di negeri Pulau Pinang untuk tapak pelupusan sampah baru adalah mencabar kerana tanah adalah terhad dan mahal. Oleh itu, kita perlu meningkatkan kesedaran rakyat negeri Pulau Pinang untuk menangani sisa kita dengan lebih berkesan melalui pengasingan sisa di punca. Amalan untuk mengasingkan sisa pepejal dan bahan kitar semula ini boleh

mengurangkan sisa yang yang dihantar ke tapak pelupusan seterusnya memanjangkan jangka hayat tapak pelupusan kita.

Tuan-tuan dan Puan-Puan yang saya hormati sekalian,

Kita tidak ada pilihan lain tetapi terpaksa mengubah cara hidup sekiranya inginkan pembangunan yang mampan. Amalan pengasingan sisa dipunca yang telah dilaksanakan di banyak negara didapati berkesan untuk mengurangkan sisa yang dijana. Selain itu, Pulau Pinang merupakan antara negeri terkecil di Malaysia menyebabkan persaingan untuk menggunakan tanah bagi membina tapak pelupusan baru menyebabkan Kerajaan Negeri memberi perhatian serius terhadap pengasingan sisa di punca ini.

Hotel Ixora merupakan hotel pertama di Seberang Perai yang mengumpul sisa dapur untuk pengkomposan. Suatu iniatif yang murni bagi mengurangkan kepanasan global dan amalan pengurusan yang baik iaitu *rethink, reduce, reuse* dan *recycle*. Program sisa sifar di Hotel Ixora merupakan program 4P iaitu *Public, People & Private Partnership*. Dimana MPSP sebagai fasilitator, Hotel Ixora merupakan pelaksana dan Syarikat

Shence International mengambil sisa organik serta membeli barang kitar semula. Bukan itu sahaja, Hotel Ixora juga komited dalam menjayakan kempen makan sampai habis dengan menasihati pelanggan supaya mengelakkan pembaziran.

Untuk makluman tuan-tuan dan puan-puan, kadar kitar semula di Pulau Pinang merupakan kadar kitar semula yang tertinggi di Malaysia iaitu 32%. Walau bagaimanapun, kadar ini masih rendah jika dibandingkan dengan negara-negara maju yang lain. Majlis Perbandaran Seberang Perai bekerjasama rapat dengan Kerajaan Negeri Pulau Pinang dalam menerajui usaha kitar semula untuk membolehkan negeri kita untuk mencapai kadar kitar semula yang paling tinggi di negara ini. Yang paling penting adalah usaha untuk mengurangkan sisa yang dijana, kemudian mengasingkan sisa yang dijana kepada sisa yang boleh dikitar semula seperti kertas, plastik, botol, dan sisa yang tidak boleh dikitar semula iaitu sisa dapur.

Tuan-tuan dan Puan-puan yang dihormati sekalian,

Pada tahun 2015, sebanyak 24,650 kg sisa dapur dan 12,958.3 kg barang kitar semula iaitu 37,608.3 kg berjaya diasingkan oleh pihak Hotel Ixora

dan tidak dihantar ke tapak pelupusan sampah di Pulau Burung. Jika dianalisa barang yang boleh dikitar semula, sebanyak 63.20% iaitu 8,189.47 kg ialah surat khabar dan kadbod, diikuti 22.24% botol plastik iaitu 2,881.95 kg dan minyak masak terpakai sebanyak 1,642 kg (12.76%).

Dasar Pengasingan Sisa di Punca adalah satu inisiatif positif yang diambil Kerajaan Negeri bagi mengurangkan sisa yang dilupuskan di Pulau Burung. Kini Kerajaan Negeri, MPSP dan MBPP sedang membuat persiapan untuk pelaksanaan Dasar Pengasingan Sisa di Punca yang akan dikuatkuasakan pada 1 Jun tahun ini. Langkah-langkah persiapan telah dan sedang diambil sebelum dasar ini dilaksanakan. Empat jawatankuasa telah ditubuhkan diperingkat Negeri bagi menyokong dan menggerakkan dasar ini, iaitu Jawatankuasa Pelaksana, Jawatankuasa Perundangan, Jawatankuasa Pendidikan dan Publisiti serta Jawatankuasa Pemandu.

Melalui Dasar Pengasingan Sisa di Punca ini, semua penduduk di negeri Pulau Pinang wajib mengasingkan sampah mereka sebelum dilupuskan; barang kitar semula kering dan sisa domestik. Kaedah ini merupakan pengasingan sisa di punca yang paling mudah. Kaedah ini dipilih kerana mudah dilaksanakan dan mudah diterima oleh masyarakat.

Lapan kategori punca kutipan sisa telah dikenalpasti; rumah kampung, rumah taman, Projek Perumahan Rakyat Termiskin (PPRT) bertingkat, Kondo, Kilang, Outlet makanan/Hotel, Pusat Beli Belah dan Kompleks Kerajaan. Oleh kerana setiap satu punca kutipan sisa ini mempunyai ciri-ciri tersendiri, maka mekanisme kutipan diatur khas untuk setiap satu.

Hotel Ixora dipilih sebagai tapak pelaksanaan Projek Perintis Dasar Pengasingan Sisa di Punca bagi kategori Hotel/Outlet Makanan. Adalah menjadi harapan kami, tuan-tuan dan puan-puan akan memberi sokongan dan menjayakan dasar ini supaya negeri kita terus bersih dan hijau.

Tuan-tuan dan Puan-puan sekalian,

Kerajaan Negeri kita juga telah mengubal Undang-Undang Kecil Pengasingan Sampah di Punca serta Undang-undang Kecil Pelesenan kitar semula yang teliti dan menyeluruh untuk menyokong dasar ini apabila dikuatkuasakan nanti. Semua pengutip bahan kitar semula akan dilesenkan supaya aktiviti kutipan barangan kitar semula ini lebih teratur.

Selain itu, program-program publisiti dan pendidikan yang melibatkan pihak-pihak berkepentingan sedang dirancang untuk dilaksanakan bagi mendidik dan memaklumkan penduduk Negeri Pulau Pinang mengenai inisiatif Kerajaan Negeri bagi melaksanakan Dasar Pengasingan Sisa di Punca. Penglibatan penduduk Pulau Pinang juga amatlah diperlukan bagi memberi maklum balas untuk meningkatkan keberkesanan dasar ini.

Tuan-tuan dan Puan-puan sekalian,

Projek-projek perintis lain juga sedang dalam perancangan untuk diwujudkan di beberapa kawasan di seluruh Negeri Pulau Pinang merangkumi pelbagai kategori punca kutipan sisa. Ini akan dilakukan dengan kerjasama ADUN kawasan dan JKKK serta agensi-agensi lain. Projek perintis akan dipantau dan segala kelemahan akan dikenalpasti dan diperbaiki supaya pelaksanaan dasar pada pertengahan tahun ini, akan berjalan dengan lancar. Saya menyeru kepada semua pihak yang hadir pada hari ini untuk bekerja rapat bagi menjayakan Dasar Pengasingan Sisa di Punca di Negeri Pulau Pinang ini. Cadangan dan pandangan daripada pihak yang terlibat dalam projek perintis seperti ini amatlah diperlukan bagi menambahbaikkan mekanisme kutipan sisa pepejal. Oleh itu, saya berharap

kerjasama dan sumbangan dapat diberikan oleh semua pihak yang menyertai projek perintis.

Dengan lafaz Bismillahirrahmaanirrahim sukacitanya saya merasmikan program Majlis Pelancaran Projek Perintis Dasar Pengasingan Sisa Di Punca Kategori Hotel/Outlet Makanan.

Sekian, terima kasih.